

**Roboh Madrasah: Tindakan Kerajaan Negeri Kedah Tidak Tahu Nilai Sejarah Islam Bernama
31 Disember, 2011**

KEPALA BATAS, 31 Dis (Bernama) -- Pergerakan Pemuda Umno menyifatkan keputusan Kerajaan Negeri Kedah merobohkan Madrasah Solihin yang berusia 100 tahun untuk membina kompleks membeli-belah adalah tindakan bodoh dan tidak berpandangan jauh.

Ketua Penerangannya Datuk Reezal Merican Naina Merican berkata kerajaan negeri pimpinan PAS itu sepatutnya berusaha memelihara bangunan warisan sejarah Islam di negeri itu dan bukan memusnahkannya demi tujuan komersial.

"Perkembangan itu sangat membimbangkan semua pihak dan ia menunjukkan seolah-olah kerajaan negeri Kedah tidak tahu menilai sejarah kedatangan Islam ke negara ini," katanya kepada pemberita selepas majlis Anugerah Kecemerlangan 2011 Sekolah Kebangsaan (SK) Bertam Indah di sini hari ini.

Terdahulu, Reezal dan bekas Perdana Menteri, Tun Abdullah Ahmad Badawi menyampaikan sijil dan hadiah kepada 288 murid Tahun Enam SK Bertam Indah yang mencatat keputusan cemerlang dalam Ujian Pencapaian Sekolah Rendah (UPSR).

Sementara itu, Reezal Merican berkata Pemuda Umno Kepala Batas sedang menganjurkan program gunting rambut secara percuma di sekolah berkenaan mulai semalam hingga 3 Jan depan.

Katanya program itu sebahagian daripada usaha Pemuda Umno mengurangkan beban kewangan ibu bapa menyediakan persiapan sekolah anak masing-masing.

"Kita harap ibu bapa sekitar Parlimen Kepala Batas boleh menghantar anak mereka ke SK Bertam Indah ini untuk menggunting rambut dan khidmat ini disediakan percuma," katanya.

Beliau berkata usaha itu diharap dapat mengurangkan beban ibu bapa dan wang yang sepatutnya dikeluarkan untuk menggunting rambut itu boleh digunakan untuk perbelanjaan lain.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=637427>